



NEDERDUITSE GEREFORMEERDE KERK IN SUID-AFRIKA

MODERATUURSKANTOOR: WES-EN-SUID-KAAPLAND

De Langestraat 5
BELLVILLE
7530

Privaatsak X8
BELLVILLE
7535

TEL: 021 957 7202
FAKS: 086 524 7117
E-POS: skriba@kaapkerk.co.za

27 Junie 2014

Alle Predikante, Gemeenteskribas en Ringskribas

Beste Kollegas

DIE WYSIGING VAN ARTIKEL 1 VAN DIE KERKORDE

Hiermee word u kennis gegee dat die proses om goedkeuring vir die nuwe Artikel 1 deur kerkrade en gemeentes te kry in die volgende maande gaan begin. Hierdie eerste skrywe is om u voor te berei op die kommunikasie wat eersdaags gaan volg.

Hierdie korrespondensie kom na u na aanleiding van die besluite van die Algemene Sinode 2013 oor die wysiging van Artikel 1 van die Kerkorde asook die hantering van die betrokke besluite deur die Moderamen van die Algemene Sinode met die oog op verdere hantering deur die kerkverband.

Verder geskied hierdie korrespondensie in uitvoering van Reglement 3 pt 10.2: "Indien die Algemene Sinode beleidsbesluite neem wat opgevolg of in die praktyk uitgevoer moet word, werk die Algemene Sinode deur die samestellende sinodes."

Die Moderamen van die Algemene Sinode was eenstemmig ten opsigte van die intensies wat in hierdie korrespondensie weerspieël word en het versoek dat dit ook in ons korrespondensie aan die kerkverband in ons sinodale gebied deurgegee sal word.

Hierdie kommunikasie handel nie nou al oor besonderhede nie. Ons sal vroeg in die derde kwartaal 'n volledige skrywe oor die presiese stappe wat gevolg moet word, aan elke kerkraad, gemeente en ringskriba stuur. Moet dus nie bekommerd wees as daar in die media verneem word van prosesse hieroor in ander streke nie.

Die volgende word van die kant van die Moderamen van die Algemene Sinode aan u deurgegee vir u kennisname op hierdie stadium:

1. BESLUIT ALGEMENE SINODE 2013

1 Die Algemene Sinode bekragtig die advies van die Algemene Taakspan Regte t.o.v. die uitleg en toepassing van die besluit van die Algemene Sinode 2011 oor die Belydenis van Belhar.

2 Die Algemene Sinode keur die wysiging van Artikel 44.1, soos deur die Algemene Sinode 2004 asook al tien die sinodes goedgekeur, sonder verdere verwysing finaal goed.

3 Die Algemene Sinode stel die volgende wysiging van Artikel 1 van die Kerkorde voor vir voorlegging aan die kerkverband (gemeentes en sinodes), ooreenkomstig Art 44 van die Kerkorde:

Kerkorde Artikel 1

1 Die Nederduitse Gereformeerde Kerk is gegrond op die Bybel as die heilige en onfeilbare Woord van God.

2.1 Die leer wat die Kerk in ooreenstemming met die Woord van God bely, word verwoord in die ekumeniese belydenisse, naamlik die Apostoliese Geloofsbelydenis, die Geloofsbelydenis van Nicea en die Geloofsbelydenis van Athanasius; en die Drie Formuliere van Eenheid, naamlik die Nederlandse Geloofsbelydenis, die Heidelbergse Kategismus en die Dordtse Leerreëls.

2.2 Die Belydenis van Belhar is deel van die belydenisgrondslag van die Kerk, op so 'n wyse dat daar ruimte is vir lidmate, ampsdraers en vergaderinge wat dit as in ooreenstemming met die Woord van God bely, sowel as vir lidmate, ampsdraers en vergaderinge wat dit nie as 'n belydenisskrif onderskryf nie.

3 Die Kerk aanvaar dat haar roeping om haar geloof te bely, altyd geld en dat 'n uitbreiding van haar belydenisgrondslag sonder dwang geskied.

4 Die Algemene Sinode dra dit aan die Moderamen op om die kerkverband te lei in die besluitnemingsproses oor die voorgestelde wysiging van Artikel 1 deur in oorleg met die onderskeie Sinodes 'n roetekaart en tydraamwerk vir die aanvang, verloop en afhandeling van die proses te bepaal.

5 Die Algemene Sinode ontvang die materiaal en studiestukke met die oog op die Belydenis van Belhar vir gebruik in die kerkverband.

6 Die Algemene Sinode doen 'n beroep op lidmate en vergaderinge om hierdie proses van besluitneming in 'n gees van gebed, onderskeiding van die wil van God, en in wedersydse respek en liefde te onderneem.

Die doel van hierdie skrywe is dus om:

- Predikante, skribas en ringskribas kennis te gee dat 'n volledige proses rondom Artikel 1 vanaf die derde kwartaal van stapel gestuur gaan word en
- Kerkrade en gemeentes te versoek om te sorg dat hulle lidmaatregisters in orde en op datum is.
Hoe moet hulle dit doen? Hulle moet in die volgende twee maande, Julie en Augustus, lidmate versoek om seker te maak van hulle lidmaatskap in daardie gemeente. Indien hulle onseker hieroor is, moet hulle die kerkkantoor kontak.

Baie groete

Monty Sahd, Quintus Heine en Bossie Minnaar

Taakspan vir die hantering van wysiging van Artikel 1 in NG Kerk in SA.